



Menteri Pengajian Tinggi adakan lawatan kerja ke UMP Pekan

Buat julung kalinya, Universiti Malaysia Pahang (UMP) menerima kunjungan lawatan rasmi Menteri Pengajian Tinggi, YB Dato' Seri Mohamed Khaled Nordin ke kampus tetap Universiti Malaysia Pahang (UMP) di Kuala Pahang, Pekan baru-baru ini.

Kunjungan beliau itu disambut mesra Naib Canselor UMP, Profesor Dato' Dr. Daing Nasir Ibrahim dan isteri serta Pengerusi Lembaga Pengarah UMP, Dato' Mohd Hilmey Mohd Taib, ahli Lembaga Pengarah Universiti, Dato' Rohani Abdullah, Pengarah Kerja UMP, Tuan Haji Rosdi Mohamed, Dekan Fakulti Kejuruteraan Mekanikal (FKM), Profesor Dr. Rosli Abu Bakar, Dekan Fakulti Kejuruteraan Elektrik dan Elektronik (FKEE), Ir. Zulkiflee Khalidin dan pegawai universiti.

Dato' Dr. Daing Nasir Ibrahim turut memberi taklimat ringkas mengenai status semasa dan kerja-kerja yang sedang dibangunkan di UMP Pekan yang berkeluasan 642 ekar itu.

Sehingga kini, seramai 2,480 pelajar dan 263 staf telah berpindah ke UMP Pekan mulai 27 Julai tahun lalu setelah pembangunan peringkat Fasa 1A terdiri daripada Fakulti Kejuruteraan Mekanikal (FKM) dan Fakulti Kejuruteraan Elektrik & Elektronik (FKEE) yang dilengkapi pejabat pentadbiran, makmal dan

pusat pengajaran dan pembelajaran siap dibina sepenuhnya.

Manakala, Fasa 1B masih dalam peringkat pembangunan dalam menyiapkan bangunan Fakulti Kejuruteraan Pembuatan, Perpustakaan dan Kolej Kediaman Pelajar.

Dalam lawatan ini juga, YB Dato' Seri Mohamed Khaled turut berkesempatan memasuki bangunan asrama yang akan menempatkan seramai 648 pelajar dengan kemudahan yang disediakan sebanyak 326 bilik yang kini di peringkat akhir pembinaan.

Bangunan yang mempunyai tiga blok asrama empat tingkat ini dilengkapi kemudahan surau, rumah felo dan pejabat pengurusan asrama.

Pembinaan sebuah lagi Kolej Kediaman bagi menampung seramai 1,400 pelajar sedang dijalankan dan dijangka siap pada April tahun hadapan.

Sepanjang lawatan, Dato' Seri Mohamed Khaled melahirkan rasa puas hati dengan perkembangan semasa pembangunan kampus ini dan beliau berharap agar pembangunan dapat dijalankan mengikut jadual yang ditetapkan bagi merealisasikan harapan seluruh warga kampus untuk mempunyai sebuah kampus tetap yang kondusif.

